

欽
定
全
唐
文

欽定全唐文卷五百十一目錄

新文豐出版社藏書

鄭絀

初日照露盤賦

冊皇太子赦詔

立廣陵郡王爲皇太子詔

順宗傳位皇太子改元誥

太微宮神主祔太廟奏

謝賜神刀食金等狀

謝借飛龍馬二匹狀

爲易定張令公進鷹籠狀

臘日謝賜口脂厯日狀

朝覲遇節進奉狀

郭雄

忠孝寺碑銘

周存

觀太學射堂賦

瑞龜游宮沼賦

太常新復樂懸冬至日薦之園丘賦

授衣賦

裴冕

舉杭州刺史韋臯自代狀

欽定全唐文卷五百十一

鄭絅

絅字文明由進士宏詞高第累擢翰林學士轉司勳員外郎知制誥憲宗監國遷中書舍人卽位拜中書侍郎同中書門下平章事罷爲太子賓客出爲嶺南節度使歷兵部尚書河中節度使大和二年以太子太傅致仕三年卒年七十八贈司空謚曰宣

初日照露盤賦

以雲表清露光發金景爲韻

日初出兮露成文盤旣潔兮光乍分凝素彩而泛濫鮮顯

氣之絪縕忽炯爾以流景乍揭然而拂雲若乃勢倚金莖
色映霞表倒初景以搖颺澹輕煙之縹緲承露華以逾明
焜霽色而共曉煥然孤秀赫奕奕於長川爛爾生光照翻
翻之高鳥盤以貞兮露以盈日旣明兮天以清焜以相鮮
若曙月之臨朝鏡粲然交映類瓊華之雜玉英金景發色
玉壺奪明數皓質以流耀含太陽之至精伊昔漢帝初營
求仙是務我皇復立承天有裕乍髣髴於帝臺宛昭彰乎
天路首出庶物表一人之大明光發四施照萬方而遐布
豈有屑瓊蕊泣珠露冀靈物之來遊望神人之自遇懿夫

合以成象麗然增光干浮雲以杲耀激旭日而悠揚仙掌
斜分若蓮峯之曙景宸心迴想如崑岫之晴霜豈比周穆
西遊覲王母於崑岳重華南狩怨帝子於瀟湘獨能覩雲
闕而飲靈漿者乎徒觀夫素色上升清光下發分迴彩以
照耀焜長空而超越日華映兮光復臨露彩揚兮色彌深
旣炫晃以如玉乍晶明而散金且孤高者可擬之以抗志
潔朗者亦仰之而爲心况地表煙息天維氣整日之麗矣
與星明而共融盤實堅然齊聖祚之悠永昔之頌靈液歌
浪井曾不如賦露盤之瑞景

冊皇太子赦詔

惟先哲王光有天下必正邦本以立人極建儲貳以承宗
祧所以啟迪大猷安固洪業斯前代之令典也皇太子純
體仁秉哲恭敬溫文德叶元良禮當上嗣朕奉若丕訓憲
章古式永惟社稷之重載考春秋之義授之七鬯以奉粢
盛爰以令辰俾膺茂典今冊禮云畢慶感交懷思與萬方
同其惠澤自貞元二十一年二月二十四日已後至四月
九日昧爽已前天下應犯死罪者特降從流流罪已下各
減一等文武官常參官及諸州府長官子爲父後者賜勲

兩轉古之所以教太子必茂選師友以輔翼之俾法於訓
詞而行其典禮左右前後罔非正人是以教諭而成德也
給事中陸質中書舍人崔樞積學懿文守經據古以參講
習庶叶於中可充皇太子侍讀天下孝子順孫先旌表門
閭者委所管州縣各加存恤五嶽四瀆名山大川委所在
長吏量加祭禮

立廣陵郡王爲皇太子詔

萬國之本屬在元良主器之重歸於長子所以固社稷正
邦統古之制也廣陵郡王淳孝友莊敬慈仁忠恕博厚以

容物寬明而愛人祇服訓辭文皆合雅講求典禮學必承
師居有令聞動無違德朕獲纘丕緒祇若大猷惟懷永圖
用建儲貳以承宗廟以奉粢盛爰舉舊章俾膺茂典宜冊
爲皇太子改名純仍令有司擇日備禮冊命

順宗傳位皇太子改元詔

門下有天下者傳歸於子前王之制也欽若大典斯爲至
公式揚耿光用體文德朕獲奉宗廟臨御萬方降疾不瘳
庶政多闕乃命元子代予守邦爰以令辰光膺冊禮宜以
今月元日冊皇帝於宣政殿仍令檢校司徒平章事杜佑

充冊使門下侍郎平章事杜黃裳充副使國有大命恩俾
惟新宜因紀元之慶用覃在宥之澤宜改貞元二十一年
爲永貞元年自永貞元年八月五日昧爽已前天下應犯
死罪特降從流流罪已下各減一等布告中外咸使聞知

太微宮神主祔太廟奏

臣謹詳三代典禮上稽高祖太宗之制度未嘗有並建兩
廟並饗二主之禮天授之際祀典變革中宗初復舊物未
暇詳考典章遂於洛陽創立宗廟是行遷都之制實非建
國之儀及西歸上都因循未廢德宗嗣統隆典克修東都

九廟不復告饗謹按禮記仲尼荅曾子問曰天無二日土無二王嘗禘郊社尊無二上所以明二主之非禮也陛下接千載之大統揚累聖之耿光憲章先王垂法後嗣況宗廟之禮至尊至重違經黷祀時謂不欽特望擇三代令典守高祖太宗之憲度鑒神龍權宜之制遵建中矯正之禮依經復古允屬聖明伏以太微官元皇帝三代睿宗文武孝皇帝神主參考經義不合祔饗至於遷置神主之禮三代以降經無明文伏望委中書門下與公卿禮官質正詳定敕付所司

謝賜神刀食金等狀

右今日中使某至奉某月日墨詔賜臣前件神刀及食金五挺并合子鎖等臣遠赴藩鎮上軫聖憂俯降王人特頒寵賜暢威懷於遠服佩以神刀矜微劣之庸軀賜之靈藥捧受戰越以忭以驚臣卽以今日發藍田縣闕庭漸遠道里猶長瞻望天顏感涕交集無任戴荷結戀之極

謝借飛龍馬二匹狀

右中使某至奉敕旨借臣前件馬至京兆府界者王人在門天驥臨路寵光荐及行色增輝上感恩私何階荅效自

臣叨承戎寄累軫皇慈念輸力於外藩降逸才於內殿分
憂未酬於聖主代勞已及於微臣雖駑鈍莫施而疲羸頓
解再馳猶勤於遠道三接已及於帝畿卽以某日至京兆
府界迴瞻魏闕目斷白雲祇事王程指期丹徼無任感戀
之至

爲易定張令公進鷹籠狀

右件鷹臣去秋來頻令入草一一揀擇皆有所能試其搏
擊下韜必中伏以上圍五方固多殊異之選下土一物實
表臣子之誠敢望備羽獵於長楊從蒐狩於天仗輕瀆旒

宸無任屏營之至

臘日謝賜口脂歷日狀

伏以王人戾止天書遠降於閩川星躔旣回冀歷猥頒於遐服推步允符於聖祚先天克合於歲功三百六旬斯須而咸覩二十四氣瞬息而可知又賜以蘭膏錫之絳雪眾香流澤芳潤忽光於悴容五藥蠲痼瘴瀝銷於腠理仰榮知忝承寵益驚闔闔九門歲時結戀於雙闕方隅萬里展效期激於丹誠敷惠未洽於遠人拜賜濫同於重鎮觀風察俗志有立於涓塵比物省躬恩何酬於覆載臣某不

勝歡躍屏營之至

朝覲遇節進奉狀

右臣伏以古者諸侯入覲必奉贄幣或以車馬或以珪璋
用展誠敬著於典禮臣繆領藩鎮獲覲闕庭幸遇昌辰又
當佳節用增聖壽以表微誠前件馬及器物謹差嶺南節
度押衙某隨狀奉進至微至薄無任慙惶伏願如日之升
如天之福垂莫大之慶保無疆之休於萬億年永康四海
臣不勝懇款之至

郭雄

雄官尚書比部郎中從德宗幸梁州遇害贈同州刺史

忠孝寺碑銘

忠孝行之本也儒釋教之宗也信順勤於行本修證立其教宗精一也故太子賓客贈太子太保范陽盧公正已頃節制此道陳情奏置佛寺乾元元年三月十三日詔下而錫其名稽諸前人崇定非一求有微名顧實若斯之美君子曰本教爲孝資孝爲忠太保對揚殊休偃俯無讓積於善者繁祉必應先於天者虔誠是歸道超三界之謂先德垂後裔之謂積太保先君河南府士曹參軍贈太子詹事

履冰任蒲江縣尉太保生於蒲江太保自省郎守通川由
通川累劔南節度屬賊臣猾夏鑾輅巡方內輯黎甿外興
軍旅日月迴燭氛沴銷清故可以彰厥誠祈厥名申願力
而闡皇明寺居縣東二十里南去主簿化十里西去靈泉
寺五里緇黃高士契來遊寺前三十步名龍潭水流入江
寺後三十步有古放生池幽遠平川草樹終古無絕乘時
遞新初抽當州大德僧二十一人在上座戒暉餘或歿或
歸碑陰具述又一十二人精選新人亦同勒名眞儀粹容
長廊廣殿龍象相屬緝緝增輝昔文翁以經籍興儒張天

師以階籙興道太保以忠孝興佛備茲三教語無異源如
仰冥鴻誰爲甲乙儒之濟理旁兼老釋孝之飾躬動循愛
敬太保守端跡俾進多門拜刑部侍郎奏獻平簡留司分
守凋瘵昭蘇官厯三朝望高二府顏子之行宣尼說之矣
詩曰媚茲一人應侯順德永言孝思孝思惟則於太保見
之矣太保嗣子幹今吏部侍郎雄早趨風教邛州刺史博
陵崔作詞場之舊錄事參軍紇干著文吏之能與上座暉
公寺主遺維都維那道義及蒲江縣侍老王璿等皆景善
良實期雄直敘銘曰

道筌眾妙儒敘彝倫各專一教釋廣三身此生不住彼劫
憑因懃功定力上願能仁生食無報身心未泯覺路求通
慈舟俟引天書降鑒君子顯允兩致不差四維而准日官
月殿化宇靈廟精識緇黃高情華皓瞻山仰峴坐樹思棠
薪傳燈續實茂聲長

周存

存德宗時人

觀太學射堂賦

以事變儀存猶
以識禮爲韻

觀射堂之攸設知射侯之有以非取善於主皮蓋繹心而

正已故王用制之而諸侯是務擇以習焉而射官觀美莫
不比乎禮樂和其容止將申明於德行必審固夫弓矢皇
家之闢化也稽古議酌前修茲宇旣啟茲道惟休職備乎
司射事集乎司裘采蘋采蘩乃施有度以熊以豹實命不
猶是用外直諸體內正乎志循聲而發彼有的得祭而益
乎爾地苟斯義罔取或承之羞旣於德可觀則無不利豈
徒稱善者五舉正者四誠有國之恒規而擇賢之盛事曩
者天下無虞羯胡生變動搖我區域辛螫我方面救弊者
權必反常以合道靖難者武故訓人以知戰於是大閱禮

行大射義息司馬無祭侯之事梓人罷棲鵠之職蓋弛張之道因時而沿革之宜可識方今寰海謐如以無事射堂歸然而獨存綵侯不張而遠國來屬貢士不習而盛德必敦故夫五帝殊儀三王異禮咸登太和與至理莫不雍雍而濟濟是知崇樂非鐘鼓之器立德爲正鵠之體也鄙生乎堯日選乎璧池達弓矢之妙旨偉棟宇之宏規儻斯道而可復庶當見擇之刑儀

瑞龜游宮沼賦

以題爲韻
并序

王者嘉瑞曰四靈龜其一也皇帝握圖御寓十有一年秋

七月旬有一日龜雄雌各一游於內池甲耀金毛文滋綠
彩帝乃出示百官以議其瑞僉曰至德之應也少司成命
文士賦以美焉敢布下才同夫體物賦曰

介蟲之長實曰靈龜明陰陽以應化察利害以俟時於穆
我皇德無不被睿澤洋溢神物來萃雖四靈其必臻懿雙
龜以時瑞陋眾水而不處選天池以自寄金甲炫晃帶璧
日以流光綠毛丰茸度薰風而含吹不啞喋於蘋藻恣東
西於荷芰爾其有金者剛有毛者柔示剛柔之合體表刑
德之具修昭品類之得性備雌雄以共游信皇德之上達

俾靈物之告休觀乎巡金塘樂翠沼晦跡無競凝神不擾
引修頸而鳥伸動圓目而珠皎映紅藻而灼爍吸清露之
縹緲天資獨智笑漁者而縈羅人謀旣臧鄙太卜之問兆
若夫百莖著下九派江中順眾流而五色斯易邁千齡而
片雲在空豈比夫承天眷感宸衷盼青瑣兮鄰紫宮顧毛
生之可寶瑞皇室兮無窮

太常新復樂懸冬至日薦之園丘賦

以題中
字爲韻

聖人之作樂也將以同和於天地崇祭也將以合奠於鬼
神祭有倫而六宗不忒樂具象而萬國以親皇家握乾符

以御寓廣樂教以同人雖功成而有作亦襲古而彌新
如繹如風俗咸和而自化擊石拊石鳥獸率舞以來馴
以賊臣不順悖於典常震驚我師旅竊犯我紀綱禮樂之
儀雖可久而可大文武之道亦一弛而一張是以七德興
而有輯六樂缺而未彰今五典丕用百度載光海外懷仁
以有截天下好樂而無荒帝乃誕敷文教式奏薰絃命太
常以修樂將享帝而配天於是繩五元以氣應考八能而
術全侈弇不興鳧氏之規惟妙上下合度磬師之法可傳
爰設業以設簾備宮懸與宿懸爾其金石具陳鞀鼓閒出

和其夏擊節以徐疾五色不亂以成文八風不姦而從律
大章彰之已合陶唐之代韶盡美矣不惟有虞之日旣而
樂復音和仲冬至屆殷薦之祭典將孔明於祀事用享
乎上帝乃奏夫圜丘撞黃鐘而角動扣太簇而徵流大不
踰宮而清濁迭和細不過羽而終始相酬是以六變而天
神可禮九成而帝德惟休大禮畢雅音收居清穆以合理
思宥密而爲猷雖化洽時和惟善政所致而風移俗易將
復樂之曲

授衣賦

以霜風轉厲遊
子未歸爲韻

二儀幹化兮四運環周大火中而退暑白露泫而成秋元
鳥去巢望雲海以幽蟄旅雁違漠指煙江而遨遊農事云
就婦功聿修感蟲鳴之促織念客恨之衣裘慮之云誰彼
姝者子弄機杼以成績秉刀尺以循理揣其修短運纖手
以俱營善乃規模敏惠心而獨揆爾其上下有序度量有
常咸循故以取制豈崇異而違方隨貴賤以合則處元素
而有章伊四人之所授必九月之降霜彼美衣工獻華服
之楚楚彼都人士被狐裘之黃黃清霜旣降商飈亦厲衰
草萎庭墜葉流砌氣蕭瑟以增冷天沈寥而澄霽雖人將

入室知所以戒寒而時或無衣則何以卒歲是乃背豳風
者無備遵月令者有繼也若乃白日向昏愁雲西展歸鳥
時聚斷蓬孤轉風生虛室之寒服念輕裘之善則晏平仲
悔累年之未易桓將軍授新衣而不遣也爰有別江山之
墨客遊他鄉而未歸驚歲序之云暮恨籌謀之尚違矧夫
搖落秋聲淒切霜氣巡階除而不樂撫心曲而誰謂且士
有知己而我獨無人皆授衣而我獨未因感時而增歎聊
作歌以自慰歌曰秋霜落兮歲已終秋雁吟兮悲遠空短
褐不完兮憂思充庭樹蕭蕭兮冷暮風

裴晃

晃德宗朝官劔南西川節度使

舉杭州刺史韋臯自代狀

右臣在福建與韋臯鄰近諳其爲政甚得人心逃亡悉歸
遠近皆悅頃在京兆以公造出官今領餘杭以理行高第
馮異漢之名將初爲赤眉所敗俄又大勝光武降璽書勞
曰昔雖垂翅回谿今乃奮翼澠池可謂失之東隅收之桑
榆矣臣以爲韋臯之功亦馮異之比往雖小失今亦大理
陛下旣捨其過而使之則必激勵其氣百倍匹夫一言相

爲而死況君臣之義誰不感恩

欽定全唐文卷五百十二

李吉甫

吉甫字宏憲趙郡人御史大夫栖筠子憲宗朝爲翰林學士轉中書舍人知制誥元和二年擢中書侍郎同中書門下平章事封贊皇縣侯徙趙國公出爲淮南節度使六年復入秉政九年卒年五十七贈司空謚曰敬憲改諡忠懿

睿聖文武皇帝冊文

維元和三年歲次壬子正月癸未朔十一日癸巳攝太尉銀青光祿大夫守兵部尚書兼御史大夫上柱國趙郡開

國公臣李巽及文武官五千七百九十四人等言臣聞自
天元而升地黃而凝皇王之道堯舜首出故典謨述焉自
堯及唐厯紀三千致理之君不過十數升平之運不至五
百天人之交際不其難歟我唐運之興昌期是膺四海一
統十聖丕承以至於皇帝則君十一而年二百矣厯考前
代丁於斯時皆王澤已竭君明寢替未若我后之維新厥
命我唐之中興厥祚顧視周漢不其蔑歟伏惟皇帝陛下
紹太宗之英武稟德宗順宗之寅畏乾乾翼翼若不滿志
故愛於文母順色之孝也睦於兄弟因心之友也崇讜議

察邇言去疑謀杜讒說俾王道正直砥爲夷塗發前聖之
韞匱披人文之光耀而氣有沴者反時爲妖若黎崇之不
恪苗人之逆命或誕敷文誥或震疊武功聖造不疾而速
非陛下疇能之然後奉四表之歡心總百神之受職蠲祀
於清廟嚴禋於上元天地察而神祇著矣臣聞之君人者
謙遜靜慤則天應之以福故休祥出焉慈仁愛育則人應
之以誠故鼓舞從焉王者因人心稽天意天下俱應而徽
號加焉至公之道不可辭也臣等所以勤勤懇懇至於再
至於三願奉鴻徽以彰休德陛下猶三揖而五讓之久而

罔已始降俞詔於是百辟卿士洎四方侯衛之臣上言曰
陛下誕睿聖之姿應會昌之期經天地之謂文禁暴亂之
謂武臣等不勝大願謹奉玉冊玉寶上尊號曰睿聖文武
皇帝惟陛下懋一德勤萬邦千祿百福垂唐之無疆

賀赦表

臣某言伏奉某月日制大赦天下至德純茂鴻私溥洽中
賀臣聞聖人紹統必建元良王者郊天是崇嚴配伏惟寶
應元聖文武皇帝陛下嗣守鴻業光膺駿命奉先思孝誠
已達於幽明立嫡以長義仍深於燕翼皇猷允塞墜禮咸

甄俯宏作解之恩式布惟新之令若乃滌瑕蕩穢雷雨之
施也茂時育物天地之仁也薄征弛力政理之源也錄功
念舊敦勸之方也加以躬儉節用捐珠棄玉執喪者俾從
達禮繫獄者咸釋明刑啟進善之門開直言之路德殷虞
夏義掩義軒凡在宥刑孰不欣悅

賀赦表

臣某言伏奉二月二十四日制書大赦天下德洋恩溥遠
洽邇安億兆欣欣罔不幸甚臣某誠歡誠喜頓首頓首伏
惟陛下體元聖之姿膺出符之運統理萬事建中於人躬

大禹之菲薄奉元元之慈儉損已以益下約身而愛人捐珠玉而不玩斥綺麗而不御事有妨於農作物有害於女工人力所疲上心攸蕩自此罷黜歸於典常若乃投荒禦魅之倫觸網嬰羅之類或炎裔淪屈骨肉相從或囹圄幽囚饋餉不至皆陽和所未煦雨露所罕霑靡不沐浴天波昭覩白日然後表捐軀之烈所以勸忠廣累葉之仁所以敦孝虔奉寢廟輟玉輿之資惠緩市估發金錢之積異類均懷土之志高年加挾纊之恩斟酌泉貨之源變通惠利之弊逋債咸已讜直必容如天之湛恩廣矣稽古之能事

備矣彼鶉衣之徒鮐背之叟孰不擊中衢之壤共樂於堯
年詠泰階之符同躋於壽域况臣謬當共理職在撫循欣
抃之誠倍萬恒品不任踊悚之至謹遣當州軍事衙前虞
候王國清奉表陳賀以聞臣某誠歡誠喜頓首頓首謹言

賀赦表

臣某言伏見制書大赦天下以今年正月一日改爲元和
元年者臣聞行慶布和允光於獻歲履端居始實屬於元
正將大有以惠人乃順時而布令法五始之要流恩而降
澤統三微之厯觀象而建元正朔所加遐邇忻戴中賀伏

惟皇帝陛下大孝嗣業鴻猷啟圖順天地而發生均日月
而齊照馴洽飛走煦育生靈既承太宗文武皇帝之耿光
稟保壽天皇之嚴訓百神享德萬國宅心敷作解之澤布
維新之典將致和平蠲京畿之逋債言念水旱薄江淮之
征賦開羅網以宥過崇勲秩以賞勞宏褒酬之典澤被幽
明旌忠烈之臣賞延於代闡庠序以勸學愍耆艾而加禮
恩覃有截化洽無垠超溢虞夏掩映軒頊首出千古遐冠
百王億萬斯年永荷天祿臣謬當任用分鎮藩維不獲奔
赴闕庭親覩盛禮

賀赦表

臣某言伏奉某月日恩制大赦天下一人有慶百度惟新
戴天履土罔不欣忭中賀臣聞天地元功施雨露以育物
帝王繼統昇日月以垂曜羣品資始萬方文明伏惟皇帝
陛下嗣守鴻業光膺駿命淳化均於四序大德合於二儀
保寧社稷光宅區宇宏孝慈以御下崇恭儉以垂休恩覃
浹旬事冠今古況乃順時布政乘春導和敷作解之恩宣
在宥之典九族既睦四門廣闢而又洗滌幽繫雷雨之施
也歸還流竄羅網之釋也移敘貶黜覆載之仁也蠲除逋

債政理之源也褒寵勲賢激勸之方也廢金寶之貢有以彰儉德也搜遺逸之士有以表至公也元勲宿將賞延子孫庶尹卿士榮周存沒廣直言之路啟進善之門德超虞夏道掩軒項必將平一殊俗發揮大猷億萬斯年永荷天緒臣謬當任用述職藩維不獲奔赴闕庭臣無任云云

賀赦表

臣某言伏奉今日赦詔自上下由衷尊尊參天地之大名貴聖文之崇號休氣宛秀彌漫雲天煙景昭華光融草樹臣誠歡誠踊再舞再蹈者有以副萬國之歡情增九

廟之炳靈矣臣聞孝子事父誠奉其色忠臣事君將順其
美皆殊外弊情實內殷超邁盈耳之言適會因心之義所
以然也伏惟陛下道宏一德功蓋四時辰象曷以煥其文
雷霆無以雄其武固以業振今昔事溢名言雖僉臣子之
謀莫究圓方之廣所謂塞元命起兆人羣岳騰聲長河變
色宜其雷震於地慶蟄戶之出幽日飛於天賀霄漢之開
朗是以神魚載舞祥鳳載鳴况於人靈况於榮位乎徒張
三寸之舌不足以談聖猷空捐七尺之軀不足以報明主
無任大慶欣忭倍百之至謹遣所部宣德郎某奉表陳賀

以聞臣某誠惶誠恐頓首頓首

賀赦表

臣某言伏奉七月三日冊皇太子詔書大赦天下臣聞元良者宗祀之本枝赦宥者含育之全德伏惟陛下赫然光大日昇於天巖然崇高岳鎮於地萬齡爲壽庶物咸春東海注百川之朝北辰列眾星之拱笑龜鶴之將老嘲鸞鳳之未伸但以禮備儲宮德刑廣物挺黃沙之罪再荷生成洗白玉之瑕俱成渙汗中外一命錫無戰之勲壽考百年調不耕之粟莫不忭舞帝渥頌歌聖慈萬歲之聲夷夏合

聽九成之樂天地同歡臣久沐鴻恩竟無上荅悅豫之至
倍百恒情謹因進藥使某陳賀表以聞

讓平章事表

臣某言臣久處繁機切思退免伏奉詔旨未允深衷仰戴
天慈如寘冰谷臣某中謝臣竊惟至敬豈敢煩文再以懇
誠上陳睿覽伏以陛下初臨寶圖獲侍丹扆一心捧日見
四海之大明八稔代天覩羣生之茂育恭承睿算實罄愚
衷雖微寸功豈敢纖負倘陛下存簪履之舊念葵藿之誠
終全深恩退蒙厚禮則是陛下旣假之以位又寵之以名

至德深仁光昭千古况臣年齒雖長筋力幸全猶得申獲
戰之功展死綏之分倘蒙寵使足可酬恩至於左右便繁
朝夕機務則心憂智竭力所不任以此至誠期於允遂然
以時不再得感王道之方平福不重來念君恩之已極進
退惶戀罔知所安謹奉表陳乞云云

第二表

臣某言臣昨八日再表自陳九日於延英奏對公事既畢
輒言私情陛下語臣以兢懼之由諭臣以進退之義今奉
批荅令斷表章無涯恩渥木石知感况陛下俯鑒誠懇知

非飾詞鑒以止足之心特申分列之外敢不上遵明令退抑微衷恪居官次更飫仁恩顧伯玉之未果徒慙聖私秉安石之偷安猶期他日銜恩之分萬殞猶輕不任感戴惶悚之至謹再奉表以聞

忠州刺史謝上表

臣某言伏奉恩命擢授臣持節忠州諸軍事守忠州刺史越自東海牧於巴中秩優專城任切謠俗臣某誠歡誠喜頓首頓首頃以進取乖方譴累斯及遠投海裔分棄朱崖陛下精意饗天覃恩率土故臣得澡身霈澤剖竹藩方恩

出九重謗銷眾口受命之日心魂載馳屬楚越途遙奔馳
道阻泝流七千涉險非一虐暑嬰癘羸骸僅存以今月七
日昇輿到所部上訖臣往歲曲臺掌禮已蒙訪對之榮南
宮起草猶兼奉蒞之任陛下展事官廟臣實職導乘輿接
星仗於鉤陳趨日馭於黃道奉璋薦鬯左右天威增秩進
階濡濡慶渥臣業以儒進才匪時須書生之幸亦已過分
中貽謗缺咎則自招今荷寵光恩由天造期勵精於緝理
庶有效於涓塵巴山萬重峽水千仞微分何寄長瞻北辰
臣無任感戴屏營之至謹遣衙官朝散大夫試兗州長史

賜紫金魚袋宇文儼奉表陳謝以聞臣某誠惶誠恐頓首頓首謹言

柳州刺史謝上表

臣某言伏奉詔書授任柳州刺史以今月二十五日至所部上訖臣某誠惶誠恐頓首頓首臣前歲以疾停官去年蒙恩除替使欲裂裳裹足趨赴京師以舊疾所嬰彌年未愈逮及今夏始就歸途襄州節度使于頔與臣早歲同官見臣當暑在道懇留就館尋假職名意欲厚臣非臣本願伏惟陛下光被之德道已洽於區中憂濟之勤心每徧於

天下常以萬邦共理必藉於循良一物不遺尚延於愚藐
假臣寵渥重領方州駑駘復效於馳驅枯朽更同於華秀
臣某誠歡誠喜頓首頓首臣聞潢汙易竭徒有朝宗之願
犬馬無識猶知戀主之誠揣分則然惟天所鑒况臣昔因
左官一紀於外子牟馳心於魏闕汲黯注意於漢庭豈伊
非夫獨無斯戀去就者榮辱之主朝廷者仕進之源臣子
之宜忠貞所志臣雖心同犬馬而分比潢汙幸躡康衢意
悲往蹇臣之此誠口不能諭意欲自達文非盡言此臣所
以自咎自傷恨乖志願猶冀苦心勵節上奉詔條惠寡安

貧下除人瘼恭宣皇化少荅鴻私不勝感戴歡欣之極謹遣衙前軍事虞候王國清奉表陳謝以聞

饒州刺史謝上表

臣某言今月五日中使劉元晏奉宣聖旨擢授臣饒州刺史兼賜官告仍至當州送上者臣與元晏以某月二十三日至上訖臣伏以郡守分符朝有常典王人賜告榮並貴臣事出非常恩超往例拜舞之際悲歡失容臣某誠歡誠喜頓首頓首臣聞千年一聖生聖時者爲遭逢萬朝一昌遇昌期者爲嘉會臣頃者每念生聖時逢聖運而職在

遐外莫能自通何嘗不顧影獨悲捫心屢泣晝望白日夜
瞻北辰豈謂分寸之績未施丹懇之誠若感微藿傾心蓋
草木之常分太陽迴燭及幽遠而不遺今陛下降不次之
恩授分憂之地拜章承旨皆自中人聖渥霑濡天威咫尺
從此萬里不爲孤臣臣某誠歡誠喜頓首頓首臣又聞臣
子之道犬馬代勞義不辭難分當竭命臣竊以飽食厚祿
肥生澤膚猶願荷戈於逐虜之疆免胄於捐軀之所至於
理財均賦惠寡安貧勸農桑敦學校儒吏之常節駑駘顧
何以堪當此殊榮少荅元造高秩以忝鴻私未酬悽悽此

誠沒齒無怠不任感涕屏營之至

諫畋獵表

陛下軫念黎元親問禾黍察閭里之疾苦知稼穡之艱難此則聖主憂勤天下幸甚但以弧矢前驅鷹犬在後田野縱觀見車從之盛以爲萬乘校獵傳說必多諫諍之臣義當守職既有聞見理合上陳拱默則懷尸素之慙獻言又懼觸鱗之禍果決以諫實謂守官正當嘉尚非足致詰夫蒐狩之制古今不廢必在三驅有節無馳騁之危戒銜楯之變既不殄物又不數行則禮經所高固非有害然逐兔

金定全唐文 卷五十二
呼鷹指顧之樂忘危履險易以溺人故老氏譬以發狂昔
賢以爲至誠陛下每與臣等討論古昔追踪堯舜固當棄
常俗之末務詠聖祖之格言願以徇物爲心克己爲慮則
昇平可致聖祚無疆羣臣異議不禁自息

請錄用令狐通奏

臣伏見代宗朝滑州節度使令狐彰臨終上表悉以土地
兵甲籍上朝廷遣諸子隨表歸闕代宗以彰遺表宣示百
寮當時在位者聞之無不感歎今有次子通在臣每感彰
同時河朔諸鎮付子傳孫無不燠灼數代唯彰忠義感激

奉國忘家遣子入朝以土地歸於先帝貞元中長子建坐
事死於施州幼子運亦無罪流於歸州欲使忠義之人何
所激勸今通幸存得遇明聖伏乞陛下召之與語如堪用
望垂獎錄

請汰冗吏疏

方今置吏不精流品龐雜存無事之官食至重之稅故生
人日困冗食日滋又國家自天寶以來宿兵常八十餘萬
其去爲商販度爲佛老雜入科役者率十五以上天下常
以勞苦之人三奉坐侍衣食之人七而内外官仰俸廩者

無慮萬員有職局重出名異事雜者甚衆故財日寡而受
祿多官有限而調無數九流安得不雜萬務安得不煩漢
初制郡不過六十而文景化幾三王則郡少不必政紊郡
多不必事治今列州三百縣千四百以邑設州以鄉分縣
費廣制輕非致化之本願詔有司博議州縣有可併併之
歲時入仕有可停停之則吏寡易求官少易治國家之制
官一品俸三千職田祿米大抵不過千石大厯時權臣月
俸至九千緡者州刺史無大小皆千緡宰相常袞始爲裁
限至李泌量閒劇稍增之使相通濟然有名在職廢俸存

額去閒劇之間厚薄異類亦請一切商定

請罷永昌公主祠堂疏

伏以永昌公主稚年夭枉舉代同悲况於聖情固所鍾念然陛下猶減制造之半示折中之規昭儉訓人實越今古臣以祠堂之設禮典無文蓋德宗皇帝恩出一時事因習俗當時人間不無竊議昔漢章帝時欲爲光武原陵明帝顯節陵各起邑屋東平王蒼上疏言其不可東平王卽光武之愛子明帝之愛弟賢王之心豈惜費於父兄哉誠以非禮之事人君所當慎也今者依義陽公主欲起祠堂臣

恐不如量置墓戶以充守奉

對素服救日蝕儀疏

日月運行遲速不齊日凡周天三百六十五度有餘日行一度月行十三度有餘率二十九日半而與日會又月行有南北九道之異或進或退若晦朔之交又南北同道卽日爲月之所掩故名薄蝕雖自然常數可以推步然日爲陽精人君之象若君行有緩有急卽日爲之遲速稍踰常爲月所掩卽陰侵於陽亦猶人君行或失中應感所致故禮云男教不修陽事不得譴見於天日爲之蝕古者日蝕

則天子素服而修六官之職月蝕則后素服而修六官之職皆所以懼天戒而自省惕也人君在名物之上易爲驕盈故聖人制禮務乾恭夕惕以奉若天道苟德大備天人合應百福斯臻陛下恭已向明日慎一日又顧憂天譴則聖德益固升平何遠伏望長保睿志以永無疆之休

右龍武統軍張伯儀謚議

或以伯儀嘗以推轂之任挫師安州於謚法得無貶乎愚以爲不然自中興三十年而來兵未戰者患在將帥以養寇自重縱敵藩身若進而亡師貶以爲義誠總干戈者必

托於萬全之名而忘一戰之效矣然則保其利者亦君子所嫌也錄其忠而勸善者非陽秋之志歟矧平居進退之節不敢二色稱爲忠臣議名之際褒勸所在請諡曰恭以旌厥美

上元和郡縣圖志序

臣聞王者建州域物土疆觀次於星躔察法於地理考中國山河之象求二儀險阻之情天漢萌而兩界分南官正而五均敘自黃帝之方制萬國夏禹之分別九州辨方經野因人緯俗其揆一矣及秦皇并六國則罷侯而置守漢

武討百蠻則窮兵而黷武雖裂爲郡縣者遠過於殷周而
教令之所行威懷之所服亦不越於三代失天地作限之
意非皇王尚德之仁誇志役心久而後悔由此觀之則聖
人疆理之制固不在荒遠矣吾國家肇自貞觀至於開元
兼夏商之職貢掩秦漢之文軌梯航累乎九譯廢置通乎
萬里然後分疆以辨之置吏以康之任所有而差貢賦因
所宜而制名物守其要害險其走集經理之道冠乎百王
巍巍乎無得而稱矣易曰天險不可升地險山川邱陵王
公設險以守其國險之時用大矣哉然則聖人雖設險而

未嘗恃險施於有備之內措於立德之中其用常存其機
不顯弛張開闔因變制權所以財成二儀統理萬物故漢
祖入關諸將爭走金帛之府惟蕭何收秦圖書高祖所以
知山川阨塞戶口虛實厥後受命汜水定都洛陽留侯演
委輅之謀田旬賀入關之策事關興替理切安危舉斯而
言斷可識矣伏惟睿聖文武皇帝陛下握樞秉聖承祧立
極祖堯舜之道憲文武之程皇王之遐蹤行之必至祖宗
之耿光寢而復耀天寶之季王途暫艱由是墜網解而不
紐強侯傲而未肅逮至興運盡爲驅除故蜀有阻隘之夫

吳有憑江之卒雖完保聚繕甲兵莫不手足裂而異處封疆一乎四海故鄣衛風偃朔塞砥平東西南北無思不服臣吉甫當元聖撫運之初從內庭視草之列尋備袞職久塵台階每自循省赧然收汗謨明弼諧誠淺智之不及簿書期會亦散材之不工久而伏思方得所效以爲成當今之務樹將來之勢則莫若版圖地理之爲切也所以前上元和國計簿審戶口之豐耗續撰元和郡縣圖志辨州域之疆理時獲省閱或裨聰明豈欲希鄼侯之規模庶乎盡朱贛之條奏況古今言地理者凡數千家尚古遠者或搜

古而畧今採謠俗者多傳疑而失實飾州邦而敘人物因邱墓而徵鬼神流於異端莫切根要至於邱壤山川攻守利害本於地理者皆畧而不書將何以佐明王扼天下之吭制羣生之命收地保勢勝之利示形東壤制之端此微臣之所以精研聖后之所宜周覽也謹上元和郡縣圖志起京兆府盡隴右道凡四十七鎮成四十卷每鎮皆圖在篇首冠於敘事之前并目錄兩卷總四十二卷臣學非博聞識愧經遠馳騫雖久漏畧猶多輕瀆宸嚴退增戰越謹

上

編次鄭欽悅辨大同古銘論

夫一邱之土無情也遇雨而圯偶然也窮象數者已懸定於十八萬六千四百日之前矧於理亂之運窮達之命聖賢不逢君臣偶合則姜牙得璜而尚父仲尼無鳳而旅人傳說夢達於巖野子房神授於圯上亦必定之符也然而孔不暇暖其席墨不俟黔其突何經營如彼孟去齊而接淅賈造湘而投弔又眷戀如此豈大聖大賢猶惑於性命之理歟將浼身存教示人道之不可廢歟余不可得而知也欽悅尋自右補闕歷殿中侍御史爲時宰李林甫所惡

金史卷之二十一
斥擯於外不顯其身故余敘其所聞係於二篇之後以著
著筮之神明聰哲之懸解奇偶之有數貽諸好事爲後學
之奇翫焉

杭州徑山寺大覺禪師碑銘

并序

如來自滅度之後以心印相付囑凡二十八祖至菩提達
摩紹興大教指授後學後之學者始以南北爲二宗又自
達摩三世傳法於信禪師信傳牛頭融禪師融傳鶴林馬
素禪師素傳於徑山山傳國一禪師二宗之外又別門也
於戲法不外來本同一性惟佛與佛轉相證知其傳也無

文字語言以爲說其入也無門階經術以爲漸語如夢覺
得本自心誰其語之國一大師其人矣大師諱法欽俗姓
朱氏吳都崑山人也身長六尺色像第一修眸蓮數方口
如丹嶷焉若峻山清孤泊焉若大風海上故揖道德之器
者識天人之師焉春秋二十有八將就賓貢途經丹陽雅
聞鶴林馬素之名往申款謁還得超然自詣如來密印一
念盡傳王子妙力他人莫識卽日剃落是真出家因問以
所從素公曰逢徑則止隨汝心也他日遊方至餘杭西山
問於樵人曰此天目山之上徑大師感鶴林逢徑之言知

雪山成道之所於是蔭松藉草不立茅茨無非道場於是
宴坐之久邦人有構室者大師亦因而安處心不住於三
界名自聞於十方華陰學徒來者成市矣天寶二祀受具
戒於龍泉法崙和尚雖不現身意亦不捨外儀於我性中
無非自在大歷初代宗睿武皇帝高其名而徵之授以肩
輿迎於內殿旣而幡幢設列龍象圍繞萬乘有順風之請
兆民渴灑露之仁問我所行終無少法尋制於章敬寺安
置自王公逮於士庶其詣者日有千人司徒楊公綰情遊
道樞行出人表大師一見於眾二三目之過此默然吾無

示說楊公亦退而歎曰此方外高士也固當順之不宜羈
致尋求歸山詔允其請因賜策曰國一大師仍以所居爲
徑山寺焉初大師宴居山林人罕接禮及召赴京邑途經
郡國譬若優曇一現師子聲聞晞光赴響者轂擊肩摩投
衣布金者邱累陵聚大師隨而檀施皆散之建中初自徑
山徙居於龍興寺餘杭者爲吳東藩濱越西境馳輶軒者
數道通濱驛者萬里故中朝銜命之士於是往覆外國占
風之侶盡此奔走不踐門閭恥如瘖聾而大師意絕將迎
禮無差別我心旣等法亦同如貞元八年歲在壬申十二

月二十八夜無疾順化報齡七十九僧臘五十先是一日
誠門人令設六齋其徒有未悟者以日暮恐不克集事大
師曰若過明日則無所及旣而善緣普會珍供豐盈大師
意若辭訣體無患苦逮中宵跣趺示滅本郡太守王公顏
卽時表聞上爲歔歔以大師元慈默照負荷衆生賜諡曰
大覺禪師海內服膺於道者靡不承問叩心悵惘號慕明
年二月八日奉全身於院庭之內遵遺命也建塔安神申
門人之意也嗚呼爲人尊師凡將五紀居惟一牀衣止一
衲冬無纊毼夏不絺綌遠近檀施或一日累千金悉命歸

於常住爲十方之奉未嘗受施亦不施人雖物外去來而我心常寂自象教之興數百年矣人之信道者方惴畏於罪垢愛見於莊嚴其餘小慧則以生滅爲心垢淨爲別捨道由徑傷肌自瘡至人應化醫其病故大師貞立迷妄除其憊冥破一切相歸無餘道乳毒旣去正味常存眾生妄除法亦如故嘗有設問於大師曰今傳舍有二使郵吏爲刲一羊二使旣聞一人救一人不救罪福異之乎大師曰救者慈悲不救者解脫惟大師性和言簡罕所論說問者百千對無一二時證了義心依善根未度者道豈遠人應

度者吾無雜味日行空界盡欲昏癡珠現鏡中自然明了
或居多靈異或事符先覺至若飲毒不害遇疾不醫元鶴
代閻植柳爲蓋此昭昭於視聽者不可備紀於我法門皆
爲妄見今不書尊上乘也弟子實相門人上首傳受祕藏
導揚真宗甚乎有若似夫子之言庚桑得老聃之道以吉
甫連蹇當代歸依釋流俎筌難名强著無蹟其詞曰

水無動性風止動滅鏡非塵體塵去鏡澈眾生自性本同
諸佛求法妄纏坐禪心沒如來滅後誰證無生大士密授
真源湛明道離言說法潤根莖師心是法無法修行我體

本空空非實性既除我相亦遣空病譬如乳毒毒去味正
大師得之斯爲究竟何有涅槃適去他方教無生滅道有
行藏不見舟筏空流大江蒼蒼遙山成道之所至人應化
萬物皆覩報盡形滅人亡地古刻頌豐碑永存澗戶